

REGLUGERÐ

27

9. febr.

um skemmtanaskatt í Suðureyrarhreppi, V.-Ísafjarðarsýslu.

1. gr.

Samkvæmt lögum nr. 34 22. nóv. 1918, sbr. lög nr. 30 19. júní 1932 og lög nr. 61 21. júní 1938, skal greiða skatt af skemmtunum fyrir almenning, sem haldnar eru í Suðureyrarhreppi, og aðgangur er seldur að, og eigi eru með lögum undanþegnar skatti.

2. gr.

Þessar skemmtanir eru skattskyldar og flokkast þannig:

1. flokkur:

- a. Fyrirlestrar og upplestrar.
- b. Söngur og hljómleikar.
- c. Sjónleikir.
- d. Kappleikir og íþróttasýningar, sem aðrir en áhugamenn taka þátt í.
- e. Kvikmynda- og skuggamyndasýningar.

2. flokkur:

- a. Dansleikir.
- b. Loddara- og fjölleikasýningar.
- c. Allar aðrar skemmtanir, sem aðgangur er seldur að og ekki eru taldar sérstaklega.

3. gr.

Af skemmtunum þeim, sem undir fyrsta flokk heyra, skal greiða 10% af aðgangseyri og af þeim, sem taldar eru í öðrum flokki 20%. Ef skemmtun er margþætt, skal miða skattinn við þann þáttinn, sem hæst er skattlagður.

4. gr.

Undanþágu frá skattgreiðslu getur hreppsnefnd veitt, ef sérstakar ástæður eru fyrir hendi, t. d. fyrir skemmtanir, sem haldnar eru í góðgerðarskyni eða fræðslu eða til styrktar menningar- og framfaramálum hreppsins.

5. gr.

Hreppsnefnd Suðureyrarhrepps hefur eftirlit með, að reglugerð þessari sé hlýtt, sér um innheimtu skattsins og er heimilt að hafa eftirlit með skemmtunum og sölu aðgöngumiða. Hún getur ráðið sérstakan mann til að annast þetta starf, fyrir sína hönd og falið það löggæzlumönnum hreppsins.

6. gr.

Hver sá, sem halda vill skemmtun, skal tilkynna það oddvita eða eftirlitsmanni skemmtana, hvar og hvenær hún skuli haldin, og afhenda honum til stimulunar í tæka tíð alla þá aðgöngumiða, er nota á við skemmtunina.

Forstöðumaður skemmtunar ber ábyrgð á greiðslu skatts af henni. Ef fleiri en einn maður stendur fyrir skemmtun, ábyrgist einn fyrir alla og allir fyrir einn, eða ef um félag er að ræða, þá allir stjórnendur þess á sama hátt.

Eigi síðar en 2 dögum eftir að samkomu er lokið, skal sá, er fyrir henni stóð, afhenda oddvita eða eftirlitsmanni alla ónotaða aðgöngumiða og greiða um leið skatt, skv. 3. gr. þessarar reglugerðar, af öllum þeim miðum, sem notaðir hafa verið.

27

9. febr.

7. gr.

Oddviti eða eftirlitsmaður getur gert eftirtalin atriði að skilyrði fyrir stimplun aðgöngumiða:

1. Að aðgöngumiðar séu þannig gerðir, að þeir verði hæglega rifnir í tvennt, þegar þeir eru notaðir, þannig að dyravörður haldi öðrum hlutanum, en aðgangskaupandi hinum.
2. Að honum sé afhent sem tryggingarfé fjárupphæð, er svarar til skemmtanaskatts af öllum hinum stimpluðu miðum.
3. Að ekki annist aðrir dyravörzlu á skemmtun en hann samþykkir, enda skuldbindi þessir menn sig gagnvart honum til þess að hleypa engum öðrum inn á skemmtun en þeim, sem afhenda aðgöngumiða, stimplaðan skemmtanaskattsstimplinum.

8. gr.

Oddviti eða eftirlitsmaður færir inn í sérstaka skemmtanaskattsbók nafn forstöðumanns skemmtunar, tegund skemmtunar og hvar og hvenær hún skuli haldin, tölu stimplaðra aðgöngumiða, sem afhentir eru forstöðumanni gegn kvittun hans ritaðri í bókina, tölu óseldra miða og seldra og útreikning skattsins. Falli skemmtun niður, skal þess getið í bókinni.

9. gr.

Skatttekjur, samkv. reglugerð þessari, renna í sveitarsjóð. Skal þeim haldið aðskyldum frá öðrum tekjum hreppsins og varið til sérstakrar menningar eða líknarstarfsemi, sem hreppsnefnd ákveður hverju sinni.

10. gr.

Brot á reglugerð þessari varða sektum. Með mál, sem kunna að rísa út af brotum á reglugerð þessari, skal farið sem opinber mál.

11. gr.

Reglugerð þessi birtist til eftirbreytni öllum þeim, sem hlut eiga að máli, og öðlast þegar gildi.

Í menntamálaráðuneytinu, 9. febrúar 1961.

F. h. r.

Birgir Thorlacius.

Ásgeir Pétursson.

28

10. febr.

GJALDSKRÁ

héraðsrafmagnsveitna ríkisins.

I. RAFORKA

Héraðsrafmagnsveitur ríkisins selja raforku á þann hátt og við því verði sem hér segir, nema á veitusvæðum, sem sérstakar gjaldskrár eru settar fyrir:

A. Lýsing.

11. Um kwst.mæli á kr. 4.00 hverja kwst.
12. Um kwst.mæli á kr. 2.00 hverja kwst., auk fastagjalds af gólfleti í rúmi því, er lýsa skal.